

■ COLUMNA

Co fissi cun ina plevonessa ateistica?

DA MARIA CADRUVI

In da mes rituals da la dumengia a bun'ura è da guardar tge che l'emissiu da radio «Perspektiven» sin DRS 2 porta a las 08.30. Quai ch'era annunzià per la dumengia dals 20 da november 2011 m'ha irrità. Ina perspectiva cun in plevon ateistic! Klaas Hendrikse, 64 onns, protestant, sin pravenda a Middelburg, ina citad en l'Ollanda. Cura ch'el fa predi la dumengia è sia baselgia sco ch'i para plaina.

En l'emissiu da radio Eha Klaas Hendrikse explitgà tge ch'el crai. Malgrà ch'el è ateist considerescha el sasez numnadamain sco cartent. I dat chaussas ch'el crai e chaussas ch'el na crai betg. El na craja betg en l'existenza dad in Dieu. Dieu n'exista betg, di el cler e net. Ma el crai che Dieu daventia, succedìa – mintga di danovamain. Per el saja Dieu in'expressiu per quai che capitia tranter carstgauns. Pia betg Dieu sco existenza fixa, absoluta, nunballuccanta, mabain Dieu sco experientscha umana – e basta. Pauc n'è quai betg, ha il plevon reformà punctuà. Quai che capitia en relaziuns umanas, per exempel entras amur e solidaritad, quai saja Dieu. Cun quest punct



da vista na sappia el natiralmain betg pregiar dal Dieu Tutpussent, ed era Jesus sco figl da Dieu na saja betg in tema ideal per in ateist. Ma i dettia anc avunda auters interessants temas per ina vita che fa senn. En sia predgia da la dumengia cumenzia el ilbler cun in'istoriga per ils uffants, magari ina dad animals. Uschia cuntanschia el l'attenziun dals pitschens e vegnia era gist da svegliar l'interess e las mirveglias dals creschids.

Quest'idea m'ha dà da pensar: Dieu per sasez, u Dieu en sasez n'exista betg. El sto adina puspè sa sviluppar, sa furmar danovamain entras l'agir dals carstgauns. «Es gibt nichts Gutes ausser: man tut es», aveva gia Erich Kästner formulà sia filosofia da viver. Quai che Klaas Hendrikse di va en la medema direcziun: Sche nus na fa-

schain nagut, lura na viva Dieu betg. Atgnamain in'idea simpla. Mintga uffant la chapescha. E Hendrikse di ch'el na saja betg l'inventader da quests patratgs. Gia blers avant el hajan ditg il medem.

Tenor mai è quai interessants patratgs per il cumenzament dad in onn nov: Tut tgi che vul sa immediat sa metter sin via per realisar Dieu. Mintgin ha la pussaivladad da daventar creatur da ses Dieu. Quai è ina midada dal curs per 180 grads. Enfin uss èsi vegnì ditg a nus da las differents baselgias che nus sajan uffants da Dieu – ussa daventa Dieu per uschè da dir «noss uffant». Nadal lascha salidar! Il Dieu che n'exista betg auter che sche nus al realisain, quai è bain la motivaziun numer in per agir en responsabladad – envers nus sez, envers la cuminanza, envers l'ambient. Quai è l'impuls ultimativ, era per midadas, per exempel per finalmain far plaz er a plevons maridads en la Baselia catolica, ubain a dunnas. Co fissi cun ina plevonessa ateistica? Ina che di en num da quel che daventa: «Sche vus as mettais sin via sun jau cun vus». Bun di bun onn.